

聖六字增壽大明陀羅尼經

宋西天三藏大師 施護奉 詔譯

如是我聞一時佛在舍衛國祇樹給孤獨園
爾時尊者阿難有大疾病佛自知已即詣彼
所敷座而坐告阿難曰汝今諦聽我有六字

大明陀羅尼能消災患增益壽命汝若受持
非但自身復令四眾苾芻苾芻尼優婆塞優
婆夷長夜安隱遠離眾苦復次阿難此六字
大明陀羅尼七十七俱胝佛并六大威德師
同所宣說六大師者一如來應正等覺二帝
釋天主三多聞天王四持國天王五增長天
王六廣目天王如是聖賢異口同音說陀羅
尼曰

難底黎難底黎難觀哩去都摩哩半拏哩俱
囉致引夜度摩帝引娑嚩引賀二合

佛告阿難此六字大明章句有大威力若復
有人王法難中驚怖大水難中驚怖大火難
中驚怖賊劫難中驚怖怨家難中驚怖眾惡
難中驚怖鬪戰難中驚怖惡曜難中驚怖如
是諸難害身之時一心稱念大明章句擁護
某甲令得解脫臨七作是語已是諸眾難速得消
除復次阿難若諸有情患諸疼痛頭痛項痛
眼耳鼻痛牙齒舌痛脣口頰痛胃脅背痛心
痛肚痛腰痛胯痛徧身疼痛及瀉痢痔瘻風
癢痰癰諸惡重病如前稱念大明章句佛大
威德令一切日月星曜羅漢聖賢發真實言
與某甲弟子應作擁護息除災患令得安樂
所有刀劍毒藥虎狼師子虵蛇蝮蝎諸惡禽
獸皆不為害瘡病不著亦不中天乃至阿波
娑摩囉部多毗舍左鳩槃荼等一切鬼將悉

皆遠離不敢爲患復次阿難若諸有情鬼魅
所著連年積月而不捨離以此真言加持於
線繫患人手時金剛手大藥叉主以忿怒力
破鬼魅頭令作七分又令大智舍利弗大神
通目捷連持戒羅睺羅及汝阿難陀皆來擁
護令得安隱若不爾者須彌山王離於本處
大海枯竭日月墮落大地崩裂如來應正等
覺無有妄語阿難此六字大明陀羅尼神通
威德得未曾有若隨喜聽聞是人恒得長壽
無病衆惡不侵何況受持讀誦書寫供養是
名成就最上增益之法阿難聞已信受奉行

聖六字增壽大明陀羅尼經